

княгини Агрены Розтиславны,³² и позна снохи своя. И призва попы, которых бог соблю, и погребе матерь свою, и снохи своя с плачем великим во псалмов и песней место, крычаще и велми рыдаша. И протчия трупы мертвых похраниша честно, и плакашеса горко глаголаше: „О земле рязанская! изменися доброта твоя и слава твоя миновася. Ныне же токмо в тебе пепел един и дым. И не един бо сей град пленен бысть, но инии мнози“³³. И поиде благоверный князь Ингорь³³ Ингорович, где побиены³⁴ быша братия ево от царя Батыя — благоверный князь Юрье Ингорович Рязанский, и брат ево князь Давид Муромский, и брат ево^а ³⁵ князь Глеб Ингорович Коломенский,³⁶ и князь Всеволод Ингорович Пронский, и князь Олг Ингорович Красной и многия князи местныя, и ^б ³⁷ боляры, и воеводы, и все воинство, удалыцы и резвцы — вси лежаща на земли пуста, на траве ковыле, снегом и ледом померзоса, никем не брегома, от зверей телеса³⁸ их снедомы³⁹ и от множества⁴⁰ птиц разтерзаемы. Вси бо лежаща⁴¹ на земли купно, друг за друга умроша и едину чашу смертную пиша. И видя князь Ингорь⁴² Ингорович⁴³ велне трупице мертвых лежаще,⁴⁴ и воскрича горко⁴⁵ великим гласом, яко труба и⁴⁶ рати разпалася,⁴⁷ в перси своя бьющеса. И ударися о землю, слезы же от очию его, яко поток течаше, и жалостно вещающе: „О милая моя братия, и господия, что вы мене единого оставите в такой погибели, почто аз прежде вас не умрох! И како заиде свет от очию моею, и где отошли есте, сокровище живота моего? Почто не промолвите ко мне — брату вашему! Цвети прекрасные, виногради⁴⁸ незрелые, не подасте сладости души моей. К чему, господие, не зрите ко мне, брату вашему, не промолвите со мною. Ужели забыли меня, брата своего. От единого отца рождены есмь мы, и от единыя утробы честного плода матери нашей великия княгини Агрены Ростиславны,⁴⁹ и единым сосцем вздоенным плодного винограда. И кому приказали есте меня, брата вашего. Солнце драгий,⁵⁰ рано заходящее, месяц⁵¹ прекрасный погибл⁵² еси, звезды восточныя — почто рано зашли есте. Лежаща⁵³ на земли пуста и никем не брегома,⁵⁴ и славы своя ни от кого не приемлете. Изменися слава ваша. Многим землям государи были есте. Зрак лица вашего изменися во истлении.⁵⁵ О милая моя братия и друзи ласковии, уже не веселюся⁵⁶ с вами. Свети мои, други, к чему помрачилися⁵⁷ есте. Не много радовахся с вами. Аще бог услышит молитву вашу, то молитися⁵⁸ о брате вашем да вкупе умру с вами. Уже бо за веселие плач и слезы приидоша ми, а⁵⁹ за утеху и за радость — сетование, и плач, и скорбь явимися. Почто аз прежде вас не умрох, дабы не видел смерти ваша, а своей погибели. Не имею роду, ни племени — токмо един осьтахся“⁶⁰. И жало-

^а В рук.: евобра.

^б В рук.: у.

³²Ростиславны. ³³Ингор. ³⁴побиены. ³⁵ево. ³⁶Коломельский. ³⁷с. ³⁸⁻³⁹изedomы. ⁴⁰множества. ⁴¹лежаща. ⁴²Ингор. ⁴³Игорович. ⁴⁴лежащее. ⁴⁵горько. ⁴⁶в. ⁴⁷разпалася. ⁴⁸виногради. ⁴⁹Ростиславны. ⁵⁰драгое. ⁵¹месец. ⁵²изгибл. ⁵³Лежаще. ⁵⁴брегоми. ⁵⁵изстлени. ⁵⁶веселюсь. ⁵⁷помрачились. ⁵⁸молитесь. ⁵⁹нет. ⁶⁰остался.